

## 敍

余自去冬遊於粵省得遇張君伯龍天姿英敏文史淹通留心世故而不習舉業真達人也其父墨園曾膺張香帥保薦循吏政治勞心每生疾疢伯龍以人子須知醫寢饋方書於今七年前春其父偶感時證病象危險羣醫無策伯龍極力救治頓獲安全國手之名一時騰噪乃益留心醫理與余邂逅便留講貫謂余所著中西各種醫書於病源治法固已詳矣而獨少本草未免缺然余曰吾所論著已寓藥性且本草業經充棟何煩再贅伯龍曰不然諸家本草揚厲鋪張幾乎一藥能治百病及遂用之卒不能治一病者註失之泛也又或極意求精失于穿鑿故託高遠難獲實效且其說與黃炎仲景諸書往往刺謬若不加辨正恐古聖之旨不能彰著于天下近日西醫釋藥每攻中醫適能中中醫之弊而中國醫士不能發西人之覆徒使西藥流弊又增甚于中國本草之禍豈淺鮮哉甚矣本草自晉唐以後千歧百出極于綱目幾令人目迷五色三家注力求深奧轉多晦義徐靈胎冠絕一時頗合經旨惜其

# 本草問答卷上

蜀天彭唐宗海容川著

受業登州張士讓伯龍參  
上海秦伯未重校

問曰。藥者。昆蟲土石。草根樹皮等物。與人異類。而能治人之病者何也。  
答曰。天地只此陰陽二氣。流行而成五運。土爲五運  
金木水火對待而爲六氣。

潤風  
燥寒

火暑人生本天親地。卽秉天地之五運六氣。以生五臟六腑。凡物雖與人異。然莫不本天地之一氣以生。特物得一氣之偏。人得天地之全耳。設人身之氣。偏勝偏衰則生疾病。又借藥物一氣之偏。以調吾身之盛衰。而使歸於和平。則無病矣。蓋假物之陰陽。以變化人身之陰陽也。故神農以藥治病。

問曰。神農嘗藥。以天地五運六氣。配人身五臟六腑。審別性味。以治百病。可謂精且詳矣。乃近出西洋醫法。全憑剖視。謂中國古人。未見臟腑。託空配復。不足爲憑。然歟。否歟。答曰。不然。西人初創醫法。故必剖割。方知臟腑。中國古聖。定出五臟六腑諸名目。皎然朗著。何必今日。

再用剖割之法。當神農時。創立醫藥。或經剖視。或果聖人洞見臟腑。均不必論。然其定出五臟六腑之名目。而實有其物。非親見臟腑者不能。安得謂古之聖人。未曾親見臟腑耶。靈樞經云。五臟六腑。可剖而視也。據此經文。則知古聖已剖視過來。且西洋剖視。只知層折。而不知經脈。只知形迹。而不知氣化。與中國近醫。互有優劣。若與古聖內經本經較之。則西洋遠不及矣。

問曰。西人謂彼用藥。全憑試驗。中國但分氣味。以配臟腑。未能試驗。不如西法試驗之爲得也。其說然歟。答曰。中國經神農嘗藥。定出形色氣味。主治臟腑百病。絲毫不差。所謂嘗藥。卽試驗也。歷數聖人之審定。蓋已詳矣。豈待今日。始言試驗哉。

問曰。辨藥之法。以形色氣味。分別五行。配合臟腑。主治百病。是誠藥理之大端矣。而形理相感。又有不在形色氣味上論者。譬如琥珀拾芥。磁石引針。陽起石能飛升。蛇畏蜈蚣。蜈蚣畏蟾蜍。蟾蜍畏蛇。相制相畏。均不在形色氣味上論。又何故也。答曰。此以其性爲治者也。夫辨藥之形

色氣味。正以考其性也。果得甚性。而形色氣味之理已賅。故凡辨藥。先須辨性。有如磁石。久則化成鐵。是鐵之母也。其引針者。同氣相求。子來就母也。以藥性論之。石屬金。而鐵屬水。磁石秉金水之性。而歸於腎。故其主治。能從腎中。吸肺金之氣。以歸於根。琥珀。乃松脂入地所化。松爲陽木。其脂乃陽汁也。性能粘合。久則化爲凝吸之性。蓋其汁外凝。其陽內斂。擦之使熱。則陽氣外發。而其體粘。停擦使冷。則陽氣內返。而其性吸收。故遇芥則能粘吸也。人身之魂。陽也。而臟於肝血陰分之中。與琥珀之陽氣。斂藏於陰魄之中。更無以異。是以琥珀有安魂定魄之功。西洋化學。謂磁石琥珀。內有電氣。其能吸引者。皆是電氣發力。能吸引之也。有陰電。有陽電。凡物中含陽電者。遇有陰電之物。即吸。含陰電者。遇有陽電之物。即吸。若陰電。遇陰電之物。即相推。陽電遇陽電之物。亦相推。其論甚悉。琥珀能拾芥。而不能吸鐵。磁石能吸鐵。而不能拾芥。以所含之電氣不同也。然西人單以氣論。猶不如中國。兼以質論。則其理尤爲顯然。磁石之質類鐵。故以類相從。而吸鐵。琥珀之質能粘。故以

質爲用而拾芥。辨藥性者。所貴體用兼論也。陽起石生於泰山山谷。爲雲母石之根。其山冬不積雪。夏則生雲。積陽上升。故或乘火氣而上飛。或隨日氣而升騰也。凡人病陽氣下陷。陽物不舉者。用以升舉陽氣。亦以陽助陽之義而已矣。蛇形長是秉水氣。行則曲折是秉木氣。在辰屬巳。在象居北。在星象蒼龍。總觀於天。知蛇只是水木二氣之所生也。蜈蚣生於南方。乾燥土中。而味大辛。是秉燥金之氣所生。蛇畏蜈蚣者。金能制木也。蜈蚣畏蟾蜍者。以蟾蜍秉水月之精。生於溼地。是秉溼土之氣所生。溼能勝燥。故蜈蚣畏蟾蜍也。蟾蜍畏蛇。則又是風能勝溼。木能剋土之義。趁此以求。則凡相畏相使相反之理。皆可類推。

問曰。物各有性。而其所以成此性者。何也。答曰。原其所由生。而成此性也。秉陽之氣而生者。其性陽。秉陰之氣而生者。其性陰。或秉陰中之色氣味之差分。而後能定其性矣。有如人參。或謂其補氣屬陽。或謂其生津屬陰。只因但論氣味。而不究人參所由生之理。故不能定其性也。余曾

問過關東人。並友人姚次梧。遊遼東歸。言之甚詳。與綱目所載無異。本草綱目載人參歌曰。三桺五加。背陽向陰。若來求我。椴樹相尋。我所聞者。亦云人參。生於遼東樹林陰溼之地。又有人種者。亦須在陰林內植之。夫生於陰溼。秉水陰潤澤之氣也。故味苦甘而有汁液。發之爲三桺五葉。陽數也。此苗從陰溼中發出。是由陰生陽。故於甘苦陰味之中。饒有一番生陽之氣。此氣可嘗而得之也。人身之元氣。由腎水之中。以上達於肺。生於陰而出於陽。與人參由陰生陽同一理也。所以人參。大能化氣。氣化而上。出於口鼻。即是津液。人參生津之理如此。非徒以其味而已。然卽以氣味論。甘苦中含有生發之氣。亦只成爲由陰出陽之氣味耳。問曰。人參不生於東南。而生於北方。古生上黨。今生遼東。高麗。皆北方也。此何以故。答曰。此正人參所由生之理。不究及此。尙難得人參之眞性也。蓋北方屬水。於卦爲坎。坎卦外陰而內陽。人參生於北方。正是陰中之陽也。坎卦爲水。天陽之氣。皆發於水中。觀西人以火煎水。則氣出。而氣着於物。又復化而爲水。知水爲氣之母。氣從水而出矣。人身腎與膀胱屬

水。水中含陽化氣上行。出於口鼻。則爲呼吸。充於皮毛。則爲衛氣。只此腎與膀胱。水中之陽化氣而充周者也。故內經曰。膀胱者。洲都之官。氣化則能出矣。此與天地水中含陽。化而爲氣。以周萬物本屬一理。水在五行屬北方。人參生於北方。秉水中陽氣。故與人之氣化相合。所以大能補氣。不獨人參爲然。凡一切藥。皆當原其所生。而後其性可得知矣。夫生於北方。有陰中之陽藥。則知生於南方。有陽中之陰藥。如礞砂是。人參屬水之陽。丹砂則屬火中之陰。丹砂生辰州者。名曰辰砂。世人用硫黃水銀二物。鍛鍊變爲赤色。以冒辰砂。又有靈砂。亦用二味鍊成。名曰二氣砂。皆謂其有補坎填離之功。法本於抱朴子。因抱朴子鍊丹砂服之而仙。後人遂有爐鼎之術。沿襲至今。尙有辰砂靈砂兩藥。均用硫黃水銀。二味鍊成者也。水銀乃石中之陰汁。硫黃乃石中之陽汁。合而鍛鍊返水銀之陰。而盡歸於陽。變爲純赤。與丹砂之色無異。但由人力造成。陰返爲陽。是陰已盡。而陽獨存。且有火鍊之毒。以之助陽退陰則可。以補陽益陰則不可。不及丹砂。由天地自然鎔鑄而成。陽中含陰。外露火色。內含水陰。

夫造靈砂辰砂者。須用硫黃水銀。二味合鍛。乃能變成紅色。則知丹砂亦必具硫黃水銀相合之性。乃變化爲純赤之色也。但丹砂是天地陰陽之氣。自然鍛鍊。不假火力。極其神妙。非可以水銀硫黃。分論丹砂也。火體之中含有水氣。故丹砂能入心。益陰以安神。又取水銀法。將丹砂燒之。既出。旣燒之砂脚。不足用。以其內之陰汞已走。陽中無陰也。水銀有毒。積陰無陽也。要之合硫磺水銀。而作靈砂辰砂。非陽中含陰之性。分水銀砂脚爲二物。則尤陰陽各異。均非硃砂之本性。惟天地南方離火。自然鎔成之硃砂。外具火色。內含水陰。合乎離卦。外陽內陰之象離中之陰。坎之水也。硃砂火色而內含水銀。卽離火中含坎水之象。故能補坎之水。以填離宮。養血安神。此爲第一。此可與人參對勘。人參秉水中之陽。而補氣。硃砂秉火中之陰而養血。一生北方。一生南方。就此二物。便知南北水火陰陽血氣之理矣。夫南北水火。雖非截然。究之各有所屬。故北方屬水多生氣分之藥。如黃芪是也。南方屬火。多生血分之藥。又如肉桂是也。

問曰。黃芪或生漢中。或生甘肅。或生山西。或生北口外。今統以北

方立論。有理否。答曰。雖不必截然在北。然其爲性。實皆秉北方水中之陽氣以生。其主北方立論。則就乎得氣之優者而言。故黃芪以北口外產者爲佳。蓋天地之陽氣。均由土下黃泉之水中。透出於地面。上於天爲雲霧。着於物爲雨露。交於人爲呼吸。只此水中之氣而已。人身之陽氣。則由腎與膀胱氣海之中發出。上循三焦。油膜。以達於肺。而爲呼吸。布於皮毛。而爲衛氣。亦只此水中之氣而已矣。水在五行。以北方爲盛。故補氣之藥。皆以北方產者爲良。漢中甘肅所產黃芪。根體多實。氣不盛而孔道少。山西所產。體略虛鬆。以氣略盛。內有通氣之孔道。故略虛鬆猶不及北口外所產者。其體極鬆。以內中行水氣之孔道更大。故知其氣爲更盛。蓋黃芪。根長數尺。深入土中。吸引土下黃泉之水。以上生其苗葉。氣卽水也。引水卽是引氣。根中虛鬆竅大者。所引水氣極多。故氣盛而補氣。人身氣生於腎。由氣海上循油膜。而達口鼻。與黃芪之氣。由鬆竅而上苗葉者無異。芪之鬆竅。象人身油膜中。亦有通水之鬆竅。油膜者。三焦也。故謂黃芪爲三焦油膜中藥。其能拓裏達表。皆取黃芪從油膜中。而上行。

外通之義也。且黃芪外皮紫黑。水火之間色也。惟其秉水中之陽氣。故成此水火之間色。三焦相火。水中之陽。名曰少陽。黃芪中通。象三焦。引水前之氣。以上生苗葉。是秉水中之陽。而生者也。故有水火之間色。而爲三焦之良藥。其氣類有如是者。芪之肉理。色黃味甘。土之色味也。黃芪入土最深。又得土氣之厚。所以黃芪。又大補脾。今人不知身中綱膜是三焦。又不知綱膜上之膏油。即是脾之物。不知膜與油相連。又安知黃芪補脾土。達三焦之理哉。能知綱膜是三焦。膏油屬脾土。則知黃芪歸脾經。達三焦之理矣。

問曰。肉桂生於南方。秉地二之火。以入血分固矣。乃仲景腎氣丸用之。取其化氣。而非取其化血。此又何說。答曰。血無氣不行。氣無血不附。氣血二字。原非判然兩端。且其化氣。乃仲景之妙用。非肉桂之本性也。人身之氣。生於腎中一陽。實則借鼻孔吸入之天陽。歷心系。引心火下交於腎。然後蒸動腎水。化氣上騰出於口鼻。仲景腎氣丸。多用地黃山藥丹皮山茱萸以生水。用荳澤以利水。然後用桂。導心火以下交於水。用附子

振腎陽以蒸動其氣。肉桂之能化氣者如此。乃仲景善用肉桂之妙。非肉桂自能化氣也。若單用肉桂。及合血分藥用。則多走血分。不是氣分之藥矣。又如桂枝。色赤味辛。亦是入心肝。血分之藥。而五苓散。桂苓甘草五味湯。均取其入膀胱化氣。非桂枝自能化氣。實因苓澤利水。引桂枝入於水中。以化水爲氣。與腎氣之用肉桂。其義相近。不得單言桂枝。便謂其能化氣也。至如黃芪五物湯。治血痺。當歸四逆湯。治身痛。皆取桂枝溫通血脉。可知心火生血。而秉火氣者。入於血分。乃是一定之理。問曰。入氣分入血分。其理未易明也。請再言之。答曰。秉於天水而生者。入氣分。秉於地火而生者。入血分。氣本於天。味本於地。氣厚者入氣分。味厚者入血分。入氣分者走清竅。入血分者走濁竅。有如大蒜。氣之厚者也。故入氣分走清竅。上爲目瞀。而下爲溺臭。海椒味之厚者也。故入血分。走濁竅。上爲口舌糜爛。而下爲大便辣痛。觀此二物。卽知入氣分入血分之辨矣。蓋得天水之氣而生者。入氣分。人參黑芪。最顯者也。外如澤瀉。苡仁。生於水而利水。二物同而不同。苡仁生於莖上。則化氣下行。引肺。

陽以達於下。澤瀉生於根下。則化氣上行。引腎陰以達於上。百合花覆。如天下之下垂。旋覆花滴露而生。本天之清氣。故皆入氣分。以斂肺降氣。鍾乳石。下垂象天。石又金之體也。故主鎮降肺氣。蛤蚧生石中。得金水之氣。故滋肺金。功專利水。其能定喘者。則以水行則氣化。無痰飲以阻之。故喘自定。麥冬天冬。秉水陰者。皆能滋肺以清氣分。龍乃水中陽物。世所用龍骨。系土中石品。非水族也。然既成爲龍形。則實本天一水中之陽氣而生。旣成龍形。又不飛騰。假石以爲質。潛藏於土中。秉是天水之陽。以歸於地下。故能潛納腎氣。收斂心神。皆用其潛納氣之義耳。茯苓。乃松之精汁。流注於根而生。是天之陽。以下返其宅者也。下有茯苓。其松顛上。有茯苓苗。名威喜芝。苔在土中。氣自能上應於苗。得松之精則有木性。能疏土也。凝土之質。味淡色白。功主滲利。能行水也。其氣不相連接。自上應於苗。故能化氣上行。而益氣。西入以松香搓發電氣。謂松香中電氣最多。松香淪入地中。變生茯苓。內含電氣。其氣上應於苗。亦如電線之相貫而已。然西法名爲電氣。中國只名爲陽氣。松脂秉

陽之精。淪入於地。化爲茯苓。陽氣所發。遙遙貫注。是生威喜芝。非氣化之盛。惡能如是。人身之氣。乃水中一陽所化。茯苓以質之滲行其水。而氣之陽助其化。所以爲化氣行水之要藥。以上所論。皆得天水之陽而生。故皆入氣分。其他入血分者。則必得地火之味而生。如當歸川芎是。蓋人身之血。是由胃中取汁。得心火化赤。遂爲血。旣化爲血。乃溢於脈。轉樞於胞宮。而肝司之。故凡入血分之藥。皆得地火之氣味。而兼入肝木。當歸辛苦。是得地火之味。其氣微溫。得木之性。而質又油潤。得地之溼。故能化汁。助心生血。以行於肝。別字本草。有謂當歸。過於辛溫。行血之功有餘。生血之功不足。不知人身之血。是中焦受氣取汁。上騰於肺部。入於心。奉心火之化。乃變赤色而爲血。西醫言飲食之汁上肺。至頸會管。遂爲紅色。下入心房。合觀此說。總見奉心火之化。而變爲血。內經所謂心血者此也。當歸辛苦溫烈之氣。正所以出心火之化。以其油潤生津。以其辛溫助心火之化。其功專生血。更無別藥。可以比擬也。仲景和血之方。無遇於溫經湯。生血之方。無過於復脈湯。溫經湯辛溫降利。與

川芎同功。復脈湯辛溫滋潤與當歸同功。知心火化液爲血則知復脈湯之生血。並知當歸爲生血之藥也。川芎味更辛苦。得木火之性尤烈。質不柔潤。性專走竄。故專主行心肝之血。夫苦者火之味也。苦而兼辛。則性溫而有生血之功。若但苦而不辛。則性涼而專主泄血。紅花色赤自入血分。而味苦則專能泄血。又凡花性。皆主輕揚。上行外走。故紅花泄肌膚脈絡在外。在上之血。丹皮色味。亦類紅花。而根性下達。與花不同。故主在內。及泄中下焦之血。桃花紅而仁味苦。皆得地火之性味者也。仁又有生氣。桃故仁能破血。亦能生血。茜草色赤味苦。根甚長。故下行之力更重。專能降泄行血也。問曰。苦得火味。其入心清火泄血。理可知矣。惟辛味之品。是得肺金之味者。乃亦能入血分。如肉桂桂枝紫蘇荆芥。此又何說。答曰。凡藥得酸味者。皆得金收之性。得辛味者。皆得木溫之性。此乃五行相反相成之理。心火生血。尤賴肝木生火。此是虛則補其母之義。故溫肝即是溫心。肉桂大辛則大溫。雖得金味。而實成爲木火之性。故主入心肝血分。以助血之化源。桂皮尤能上行。張仲景復脈湯。用桂枝。取其入心

助火。以化血也。遠志之性亦同桂枝。但桂枝四達。遠志則係根體又極細。但主內入心經。以散心中滯血而已。不獨草木本火味者入血分。有如馬爲火畜。故馬通亦能降火以行血。棗仁秉火之赤色。故亦人心養血。總見血生於心。大凡得地火之性味者皆入血分也。問曰生地質潤。中含水液。阿膠濟水煎成。性本水陰。二藥皆能生血。何也。答曰離卦中之陰爻卽坎水也。阿膠生地。以水濟火。正是以坎填離。有此陰汁。而後得心火化赤。卽爲血矣。正內經。中焦取汁。奉心火變赤爲血之理。知血之生化。凡入血分之藥。從可知矣。

問曰南北地有不同。所生之藥。旣有水火血氣之分。先生已言之矣。至於東南中央。豈無異致。何以不論及耶。答曰南北水火。其顯分者也。况陰陽摩盪。南未嘗不得北氣。北未嘗不得南氣。至於東南循環。中央四達。其氣錯行。故可不分。然亦有可分別者。如青礞石。化紅皮。荔枝核。皆秉東方木氣者也。或能平肝以行痰。或能散肝以解鬱。皆以東方產者。爲得木氣之全。故此等藥。廣東產者爲佳。川貝母生石膏桑白皮。皆秉西方

金氣而生。或利肺降痰。或清金去熱。皆以西方產者。爲得金氣之清。故此等藥。以川西產者爲佳。至於李用東行根。石榴用東向者。皆取得木氣也。側柏葉皆西指。取用必取西枝。只是取其得金氣耳。至於中央。備東南西北之四氣。而亦有獨得中央之氣者。如河南居天下之中。則產地黃。人見地黃黑色。不知其未經蒸晒。其色本黃。河南平原。土厚水深。故地黃得中央溼土之氣而生。內含潤澤土之溼也。人徒見地黃蒸成色黑。爲能滋腎之陰。而不知其實滋脾陰。內經云脾爲陰中之至陰。地黃以溼歸脾。脾陰足。則肝腎自受其灌溉。山藥亦以河南產者爲佳。味甘有液。是得土濕之氣。功能補脾。亦補脾之陰也。惟山藥色白。則得土中之金氣。故補脾而兼益肺。地黃能變黑色。實得土中之水氣。故潤脾而兼滋腎。雖同產一地。而有種類形色之不同。故功亦略異。問曰甘草入脾。何以生於甘肅。白朮正補脾土。何以不生於河南。而生於浙江。答曰此正見五行之理。不得截然分界。况土旺於四季。是四方皆有土氣。白朮之生於江浙。必其地饒有土脈。故生白朮。內含甘潤之油質。可以滋脾之陰。外發辛香之溫性。

。可以達脾之陽。取溫潤則用浙產者。以其油厚也。取溫燥則用歙產者。以其較烈也。甘草味正甘入脾胃。守而不走。補中氣。和諸藥。雖不生於河南中州。而生於極西之甘肅。亦由甘肅地土敦厚。故生甘草。根深者至四五尺。與黃芪無異。但黃芪中空屬氣分。是得土中水氣。甘草中實。純得土氣之厚。故深長且實也。雖生於西。而實得中土之氣。總之五行之理。分言則各別方隅。合論則同一太極。問曰藥有以天時名者。如夏枯草。款冬花。得無以時爲治乎。答曰然天時者。五行之流運。陰陽之分見。故凡論藥。又當論其生之時。與成之候。雖不盡拘於時。而亦有以時爲治者。夏枯草生於冬末。長於三春。是正得水木之氣。遇夏則枯者。木當火令。則其氣退謝。故用以退肝膽經之火。款冬花生於冬月冰雪之中。而花又在根下。乃坎中含陽之象。故能引肺中陽氣下行。而爲利痰止欬之藥。二物皆以時名。皆得其時之妙用也。又如冬蟲夏草。本草不載。今考其物。真爲靈品。此物冬至生蟲。自春及夏。蟲長寸餘。粗如小指。當夏至前一時。猶然蟲也。及夏至時。蟲忽不見。皆入於土。頭上生苗。漸長到秋分。